

**NOSEW SĒRIÑ MUUSAA KA**



**XARNU BI**

**Sëriñ bi noo ngi deeti ñaan**

**Faxiir dafay nangoo dagaan**

**Nangul nu lépp lu nu ñaan**

**Ndax Yàlla naatal xarnu bi**

**Noo ngi dagaan ci Mustafaa**

**Ma nekk marwata ak safaa**

**Ak àqi Amdi Mustafaa**

**Mi Yàlla jébbal xarnu bi**

**Ak àqi mboolem ay rakkam**

**Ak àqi séen baay yi ñu am**

**Ak àqi seex yi Bàmba am**

**Ndax Yàlla naatal xarnu bi**

**Mboolem muriit yépp a ngi tuub**

**Tey réccu bàkkaar yi nu juub**

**Ba lu nu bay-bay, du nu góob**

**Sëriñ bi geesul xarnu bi**

**Mbàkke, dangay boroom i mbóot**

**Te sag njaboot tawat giloot**

**Ñu def ma ab àntalpareet**

**May làpputoo waa xarnu bi**


**Aw ma maxaamam di la woo**

**Waaye murit yi ñoo ma woo**


**Ne tawatal te bu nu woo**

**Saw làmmiñay wow xarnu bi**

**Tay jii ma wax ba ne tareet  
Ngir yaa ma def àntalpareet  
Yaa fab i xam-xam ne yëreet  
Ci sama xol, ci xarnu bi**




**Te bul ma tanqamlu ci ñaan  
Ngir lii ma bon tey ku añaan  
Muriid yi yépp a la ko ñaan  
Ngir bëg nga dekkal xarnu bi**




**Jooy i perantal la nu jooy  
Boo nu fabul, lee nu ne wóoy  
Ku nu yafal, ban def i kóoy  
Mu dellu naatal xarnu bi**

**Jisu nu yaay te noo ngi raam  
Ku ñàkk yaay, day nàmp maam  
Buural te boot nu, ngalla daam  
Roggndi mboolem xarnu bi**

An illustration of two stylized human figures in profile, facing each other as if in conversation. They are rendered in shades of grey and green. The background behind them is a large, light yellow circle with a dashed white border. The text is overlaid on this circle.

**Fabal sa doom yi yépp boot  
Ñoom it ñu boot séen ug njaboot  
Ku manta boot nga jox ko mbóot**

**Ndax Yàlla naatal xarnu bi**

An illustration of a stack of five books of varying colors (yellow, orange, green, blue, and red) stacked on top of each other. The books are rendered in a simple, cartoonish style.

**Te fab muriit yi suturaal  
Mottali jàkka jii ñu naal  
Foo toll dolli séen alaal**

**Ndax Yàlla naatal xarnu bi**

**Ndax Yàlla Amdi Mustafaa**

**Tabax jumaa yi Mustafaa**

**Bam tol ni marwata ak safaa**

**Ndax Yàlla naatal xarnu bi**

**Mboolem murit yépp a ngi jooy**

**Ngir luñu bay mu dal di gooy**

**Ba séen i àddiya a ngi booy**

**Sarax nu naatal xarnu bi**

**Jamono jaa ngi xiif a xiif**

**Luñ togg bar gi ne ko fuuf**

**Seex Bàmba neel ngën ji mbindeef**

**Mu dellu naatal xarnu bi**

**Xiif tax na ñenn mag ñi yooy**

**Xiif tax na gor su ndaw di jooy**

**Xiif tax na yenn tool yi booy**

**Sëriñ bi geesul xarnu bi**

**Tax na ña daa joxee ngi laaj**

**Ñii jàpp séen i sas di xaaj**

**Ken dóotu dem fenn ba waaj**

**Sëriñ bi geesul xarnu bi**

**Wolof Ak Xamle**


**Xam nañ ne yaa nu daa tawal**

**Daa nu bayal daa nu ñoral**


**Daa nu roñal daa nu daggal**

**Feesal nga sàqi xarnu bi**

**Sa yërmandee nu daa defal  
Lu xel dajul daa nu dëfal  
Daa nu tibbal daa nu lehal  
Reggal nga mboolem xarnu bi**



**Sa yërmandee nu daa sanal  
Jigéen ña yaa nu daa amal  
Tay ñépp a yam ken amatul  
Sëriñ bi geesul xarnu bi**



**Ñii séen i sag sàggiku na  
Ñii séen i gaay dàggeeku na  
Ñii séen i ngëm rékkiku na  
Ngir ñàkk gii ci xarnu bi**



**At moo ne ndax mu tane daaw**

**Muy gën a far dellu gannaaw**

**Ba rab yu aay yi sax di naaw**

**Ay Mbàkke geesul xarnu bi**

**Wuy nun a wuy noo ka torox**

**Yalwaan amoo ku la sarax**

**Garab bu daanoo xob ya lax**

**Bàmbaay ndànjaamal xarnu bi**


**Garab gu mag bu nee jirim**

**Garab yu ndaw yi diy jirim**

**Meññat ma say mbir ma ëlëm**


**Lii rekk a dal waa xarnu bi**

**Allaahu akbarus samaan  
Jamono moo man a safaan  
Xéewal yi daf daa walangaan  
Ci dabi mboolem xarnu bi**

An illustration of two stylized human figures in profile, facing each other as if in conversation. They are rendered in shades of grey and green. The background behind them is a large, light yellow circle with a dashed white border. The text is centered over this illustration.

**Libeek sikkeek i sahfaaran  
Lan daa diwoo muy walangaan  
Nuy xelli kopp ya di naan**

**Wata ya korne xarnu bi**

An illustration of a stack of five books of varying colors (yellow, orange, green, blue, and red) stacked on top of each other. The text is centered below this illustration.

**Astaxfirul Laahal Asiim  
Tuub nanu lan daa def i koom  
Te muy lu neexulon boroom  
Jurbel a wuuteek xarnu bi**

**Xéewal yi daf daa wal-wali**

**Baawaan fi nun di kel-keli**

**Moo tax ma jóg di péli-péli**

**Sëriñ bi geesul xarnu bi**

**Xéewal yi daf daa walangaan**

**Waxset nga wuute nga ak sayaan**

**Xamoo xur ak tund ak sayaan**

**Sam ndox a naatal xarnu bi**


**Wàcc nga yaw loo mas a wax**

**Def nga ko jox ku mat a jox**


**Daawoo nu nax daawoo nu ñax**

**Séddon nga mboolem xarnu bi**

**Gàncax gu ndaw gi weddatul  
Mag ña nga yar ken wuddatul  
Moo tax ma naa la suuxatal  
Njëmbët li won ci xarnu bi**

An illustration of two stylized human figures in profile, facing each other as if in conversation. They are rendered in shades of grey and green. The background behind them is a large, light yellow circle with a dashed white border. The text is centered over this illustration.

**Njëmbët la mooy gaa ya dikkon  
Daa wéy ci xéewal ya fi won  
Tay ñi ngi def ya ñu bawoon  
Ngir ñàkk gii ci xarnu bi**

An illustration of a stack of four books of different colors (yellow, orange, green, and blue) stacked on top of each other. The books are rendered in a simple, cartoonish style. The background behind the books is a light yellow circle with a dashed white border, matching the one above.

**Ag ñàkk a bon ci waa ju baax  
Day tas kërëm xolam di jaax  
Daa ceebu tay ngay aña laax  
Jaaxal na gaa yi xarnu bi**

**Leeg-leeg nga gis fi ab murid**

**Muy taxawaalu nib mariid**

**Walla mu xàcc def tariid**

**Ndaw njombe gaa ya xarnu bi**

An illustration of two stylized human figures in profile, facing each other as if in conversation. They are rendered in shades of grey and green. The background behind them is a large, light yellow circle with a dashed white border. The text is centered over this illustration.

**Ànd ak komersaa ya di jaay**

**Ñii di wajaaseeri ba xaay**

**Te xam ne yaa doon séen i baay**

**Moo! tee nga naatal xarnu bi**

An illustration of a stack of five books of varying colors (yellow, orange, green, blue, and red) stacked on top of each other. The text is centered below the stack.


**Ñilee ngi xàcc def i seef**

**Ñii def i dag ngir bañ a loof**


**Ñii daw ba raw ba ni nu fiif**

**Moo! tee nga naatal xarnu bi**

**Yaw la nu yaakaar abadaa  
Ngir yaa nu tàggaleek bidaa  
Tuub nanu mboolem la nu daa  
Bàkkaar ci njëkk xarnu bi**




**Yërëm nu tay yaru na nu  
Dóotu nu fo xàmmee na nu  
Dóotun nelaw yewwu na nu  
Yërëm nu naatal xarnu bi**




**Soo nu joxoon la nu yoron  
Dóotu nu def nanu defon  
Xanaa yëgoo ne yaru nan  
Ku weddi laajal xarnu bi**

**Yërëmlu nan toroxlu nan  
Jooy na nu ren saraxtu nan  
Soppeeku nan jébbalu nan  
Sarax nu naatal xarnu bi**




**Nun tuxu nan sun kër i baay  
Gàddaay te def la ngën ji baay  
Tuubaa di kër bàmba a di waay  
Sëriñ bi geesul xarnu bi**



**Murit yi saalit nanu ren  
Ngir xam ne yaa léen ame woon  
Yaa léen joxon la ñu yoran  
Yóbb nga mbóoti xarnu bi**

**Tiijaan yi réccu nañu tay  
Xam nañ ne bëy du sóoru boy  
Yaa man a may nit lu ko doy  
Moo! tee nga naatal xarnu bi**



**Bawal-bawal jolof-jolof  
Mboolem pël ak naar ak wolof  
Kenn gisatul ku am i yëf  
Sëriñ bi geesul xarnu bi**



**Koo xam ni daa na am i jaag  
Daa am i àngaar ak i juug  
Mii at mu am déwén mu jéeg  
Sëriñ bi geesul xarnu bi**



**Ku mas a am yaari wata**

**Soxla na ren yaari mata**

**Te manta am njëgu mata**

**Sëriñ bi geesul xarnu bi**

**Koo xam ni daa na am i taax**

**Tay mi ngi ngeju'b néeg bu baax**

**Bu gën a féex bam ne ca faax**

**Sëriñ bi geesul xarnu bi**


**Kër yaa ngi wéet ba ni wëyën**

**Lal yañ yoroon def i koron**

**Ña doon i wuur def i koyan**


**Sëriñ bi geesul xarnu bi**

**Tubaab yi sax pert nañu  
Ña léen gëmoon perdi nañu  
Yahood yi sax fayit nañu  
Yal na ñu yées ci xarnu bi**



**Ña tukkiwan faf nañu laŋ  
Fuñ wàcc deefi léen falaŋ  
Àdduna yaa ka noo welaŋ**

**Sëriñ bi geesul xarnu bi**



**Naar yaa ngi yalwaan ak a xaar  
Seex buñ xamoon dellu fa jaar**

**Ken talatul loo jox i naar**

**Sëriñ bi geesul xarnu bi**

**Wuy Mbàkke ! yuuxu nan ba dee**

**Wallu nu boo yeexee nu dee**

**Melal ni kuy rammu ku dee**

**Yaa nuy tinul waa xarnu bi**

**Yaw yaay donoy Muhammadu**

**Te yor nga sirrub Ahmadu**

**Te yor nga bóoti Haamidu**

**Man ngaa defar waa xarnu bi**

**Wolof Ak Xamle**

**Man ngaa defar bitteek i biir**

**Defar nga baadoola ak i buur**

**Yaa dindi àllarba ak dibéer**

**Sàkk Muriiti xarnu bi**

**Man sa kanam, man sa gannaaw**

**Loo sant Yàlla mu ne waaw**

**Loo wax fa diiwaan ñu ne waaw**

**Wax léen ñu naatal xarnu bi**

**Sa mbir ëppante na ak dërëm**

**Nde xarnu bépp a am gërëm**

**Te am dërëm te yokk ngëm**

**Nga may njariñ waa xarnu bi**


**Ma léebu gaa yi la xamul**

**Waa ju xamul dees koy xamal**


**Subhaana, yaa ka mat kumal**

**Yaa neex a wan waa xarnu bi**

**Nan far waññee ku tagg daam  
Ngir moo nu may lu jomb i maam  
Booleek Muriit yuy daw di raam  
Ag cant a war waa xarnu bi**



**Bàmba manee fu laa misaal  
Yaay géej gi wër waa senegaal  
Deefu la jàlle genn gaal  
Say duus a tooyal xarnu bi.**



**Seex Bàmba yaa dik mbàmbulaan  
Ku sóobu dóotu ñaani naan  
Ku màndi day dimbaan i teen  
Say kaas a màndal xarnu bi  
Ku sóobu génnaaley dërëm**

**Békkoor bi dóotu dem kërëm**

**Ku ne corom kaasub ngërëm**

**Du mar li des ci xarnu bi**

**Géejug hikkam gim daa dëtëm**

**Ba ne ko secc mook ñoñam**

**Maseefu caa nàndal ku xam**

**Toqan ga doy na xarnu bi**

**Wolof Ak Xamle**

**Luumloo na fóore ya wéyon**

**Raamloo na kàngam ya fi won**

**Daane na bër ya fi ne won**


**Amul niroom ci xarnu bi**

**Sirrub andaari xam-xamam**

**Museefu caa nattal wujjam**

**Ayam gi suural naw ñoñam**

**Wujjam amul ci xarnu bi**


An illustration of two stylized human figures in profile, facing each other as if in conversation. They are rendered in shades of grey and light green. The background behind them is a large, bright yellow circle with a dashed white border. The text 'Wolof Ak Kanne' is written in a light grey, sans-serif font across the middle of the yellow circle.

**Fekkoon na dab yi ne xareet**

**Mu soppi léen watay sareet**

**Duy léen ngëneel bañ ne sëreet**

**Wàccoo na mook waa xarnu bi**

An illustration of a stack of five books of varying colors (yellow, orange, green, blue, and red) stacked on top of each other. The books are rendered in a simple, cartoonish style.


**Taalif na móol yu fees i taax**

**Te xalimaam du juum du jaax**

**Te am xelam du gag du naax**

**Du fàtte lëf ci xarnu bi**

**Day duusu dongo yay dëtëm  
Duus yay jallaañoo ci'b dënnam  
Mooy géej gu ridwaan diy jënam  
Te mus la fer ci xarnu bi**



**Bàmbaa di géej gu tàbbi géej**

**Fekk fa géej gu ne ko ngiij**

**Mu duy ca leer ya ba ni giij**

**Dellusi tooyal xarnu bi**



**Lu baax du baax ba weesu baax**

**Waaye Sëriñ bee jàll baax**

**Baax a ngi yam fi xotti baax**

**Baaxaale gaa ya xarnu bi**



**Waa ju la sopp dal di baax**

**Waa ju la weddi dóotu baax**

**Waa joo gërëm muy gën di baax**

**Waayoo ko warna xarnu bi**

**Waayam du ñiit gariiti laax**

**Dóotu limbooy sagnar di daax**

**Loxoom du daarati ci mbaax**

**Ku weddi laajal xarnu bi**

**Ku weddi lii demal lagan**

**Isaa di mbar moo man u gan**

**Yaaram la wuute na ak sagan**

**Bàmbaa ko ñaak ci xarnu bi**

**Ngëneeli daam yi gën a tuut**

**Xel manu koo takk di root**

**Mbaa xalima ak i daa yu xóot**

**Lottal na mboolem xarnu bi**

**Xarbaax la raw na kuy xiyaas**

**Lu xel dajul deefu ko raas**

**Fugraas la raw na góoru faas**

**Sakkaa ñi teewe xarnu bi**

**Moo jar a way bañ a selaw**

**Guddeek bëccëg bañ a nelaw**

**Ba raw ñi daa wayal calaw**

**Ngir li mu def ci xarnu bi**

**Seex Bàmba yaa bariy njariñ**

**Fëriñ nga wuute ga ak këriñ**

**Sëriñ si yaa di séen sëriñ**

**Yaa man a leeral xarnu bi**

**Sëriñ si, ñoo doon fatafoor**

**Sondeel du mel nib limiyeer**

**Jant la moom fawxa na weer**

**Leeram ga tiim na xarnu bi**

**Seex Bàmba yaa dig mànduwaar**

**Waaju la tàbbi dóotu réer**

**Yaay jant say gaa ya di weer**

**Leer ya gëndoo ci xarnu bi**

**Nun sóobu nan la jàlle nu  
Waay Mbàkke! bul dem bàyyi nu  
Yawmal Xiyaam yobbaale nu  
Te yóbb mboolem xarnu bi**

**Seex bàmba yaay ngën ji keno**

**Sa jën yi doy na ñuy dono**

**Soo doon fetal di ag këno**

**Say wal a mokkal xarnu bi**

**Billaahi wéeru nan ci yaw**

**noy nan ci yaw lu man a xew**

**Ngir urwatul wusxaa du sew**

**Déesu ko dog ci xarnu bi**

**Seex Bàmba yaay ngën ji wurus**

**Foo génn xànjari daaldi rus**

**Gor su la waaje dóotu rus**

**Doy nga takkaayal xarnu bi**

**Def nan la ngay sunu takkaay**

**Di sun bitig nu di la jaay**

**Yaa gën i baay gën i nejaay**

**Yaa gën xariiti xarnu bi**

**Seex Bàmba yaa di'b libidoor**

**Làmburde wuute na aki cuur**

**Sëriñ si sóobuwuñ sa mboor**


**Nde kon ñu naatal xarnu bi**

**Seex bàmba yaa nu mat boroom**

**Fekkoo ci àddina moroom**

**Tooñoo boroom, tooñoo moroom**

**Tinul nu tooñ i xarnu bi**


An illustration of two stylized human figures in profile, facing each other as if in conversation. They are rendered in shades of grey and green. The background behind them is a large, light yellow circle with a dashed white border. The text 'Wolof Ak Xanle' is faintly visible in the background.

**Buur Yàlla jox na lay midaay**

**Diiwaan ba xam nañu sa waay**

**Waajoo gërëm, kërëm du daay**

**Yaay kerkeeraanub xarnu bi**

An illustration of a stack of five books of varying colors (yellow, orange, green, blue, and red) stacked on top of each other.


**Seex Bàmba yaa di'b kerkeeraan**

**Ku jëm ca Yàlla na la ñaan**

**Soo doonu tur di «Alxuraan»**


**Yaa boole bóot i xarnu bi**

**Def nan la geg bu deefi yéeg  
Te def la mbër mu deefi déeg  
Kelanj mi, wub nga bër yi jéeg  
Sebul ci mboolem xarnu bi**

An illustration of two stylized human figures in profile, facing each other as if in conversation. They are rendered in shades of grey and green. The background behind them is a large, light yellow circle with a dashed white border. The text is centered over this illustration.

**Yàllaa la jiital ca xadiim  
Tudde la Ahmadul Xadiim  
Jiitu na aadama ak i doom**

**Jiitu na gaa yi xarnu bi**

An illustration of a stack of four books of different colors (yellow, orange, green, and red) stacked on top of each other. The background behind the books is a light yellow circle with a dashed white border. The text is centered over this illustration.

**Yawma ajaaba bi balee  
Yéefar ya juum wuyoo walee**

**La Bàmba not ñu naa a  
lee Notaale góor i xarnu bi**

**Sirrub dëggoom ba la ne naat**

**Ca doqi góor ña ñuy sanaat**

**Ñépp ni nuut tàllal i baat**

**Ken yënguul ci xarnu bi**

**Mu jàll toog ca gàngunaay**

**Buur Yàlla ràng koy medaay**

**Diiwaan ba jox ko séen i gaay**

**Keroog la àtte xarnu bi**

**Billaahi Bàmbaa dim kelaŋ**

**Moo jàpp saytaane welaŋ**

**Ba tër ko rendi fa gabaŋ**

**Ñibbisi wax ko xarnu bi**



**«Qaatalu fil bahril lahiin**

**Kabkabahuu nadbul amiin**

**Mahal amiini wal amiin»**

**Moo ko waxon waa xarnu bi**

**Yonnente ba ak ahlu badar**

**Ñoo dàkku kaarce ya ko wër**

**Saytaane nërméelu di ser**

**Làbbe ya daw ci xarnu bi**


**Gaboŋ ña xam na ñuy biram**

**Galwaa ña xam na ñuy biram**

**Làmbarna seere nay biram**


**Seere sa wóor na xarnu bi**

**Keroog la làbbe ya ne waaw  
Maaràbbu bii bu leen ci gaaw  
Leeram gi sarna asamaaw  
Sar na ci suufi xarnu bi**

An illustration of two stylized human figures in profile, facing each other as if in conversation. They are rendered in shades of grey and green. The background behind them is a large, light yellow circle with a dashed white border. The text is centered over this circle.

**Tubaab ya naa ko nan maroo  
Soldaar sa naa ko bun meroo  
Làbbe ya naa ko bun woroo**

**Ñibbil yilif nga xarnu bi**

An illustration of a stack of four books with yellow, orange, and green covers, resting on a green base. The stack is positioned in the center of the page, below the text.

**Tëggaale wuñ la asamaaw  
Bër yépp booloo nañ ne waaw  
Goron yi lay nañ sa gannaaw  
Nde wub nga làmbi xarnu bi**

**Karaama yaa nu ko xamal**

**Màqaama yaa nu ko amal**

**Kaaraange yaa nu ko defal**

**Yaay suturaal waa xarnu bi**

**Àll ak kër ak jaam ak gor ag**

**Ceddook sëriñ buur aki dag**

**Bokk ak i jàmbur ñépp a jag**

**Jaaraama daam ci xarnu bi**

**Luy nit ku ñuul ak nit ku weex**

**Diggante askan yu du jeex**

**Fu nekk daam def na fa seex**

**Bu man a yor waa xarnu bi**

**Bindéef yi yaa léen fal i buur**

**Ku mas a xëy taali baboor**

**Di xelli attaaya ju foor**

**Fajoon nga aajoy xarnu bi**

**Soodaanu war nañ ne nërëm**

**Biidaanu war nañ ne naham**

**Ñépp di sant ak ay gërëm**

**Ngir yaa defar séen xarnu bi**

**Koomersi naa la mersi ñoom**

**Pël yaa nga naa la «mujji doom»**

**Wolof ya naa amoo moroom**

**Yaa dàmbe tagg i xarnu bi**

**Ken dóotu dox kem li nga dox**

**Ken dóotu wax kem li nga wax**

**Ken dóotu jox kem ñi nga jox**

**Darale woon nga xarnu bi**

**Limaamu Sahraaneey kamaal**

**Téeréerm ba Bàmba lay misaal**

**Giñ naa ne mooy aboo rijaal**

**Xutbu ya won ci xarnu bi**

**Mboolem i xawsu ya wéyon**

**Yaa sóobu ngér ya ñu awon**

**Wommat nga ruu ya ñu yoron**


**Yeesal nga wirduy xarnu bi**

**Xaadiru yeesal ngay biram**

**Tiijaanu yeesal ngay biram**

**Saasali yeesal ngay biram**

**Kuntiyu jox la xarnu bi**

An illustration showing two grey silhouettes of people's heads in profile, facing each other. Between them are three curved lines representing sound waves, indicating they are speaking or listening. The background is a light yellow circle with a dashed white border.

**Lottal nga ñoñ sariihatu**

**Jommal nga ñoñ haxiixatu**

**Sa ngér mi mooy tariixatu**

**Moo gën a jub ci xarnu bi**

An illustration of a stack of five books. The books are colored yellow, orange, and green. The stack is positioned in the center of the page, above the text.

**Woroom kurus ya daa aji**

**Ak gaa ya daa siyaare ji**

**Yaa tax ñu daa siyaare ji**

**Sëriñ sa woon ci xarnu bi**

**Wommat nga naar yeek i wolof**

**Xàllaat nga ngérum tasawuuf**

**Sëriif si yaa tee ñu suruf**

**Jàlle nga léen ci xarnu bi**

**Roytéefi xutbu yi nga won**

**Kiimaani labdaal yi nga won**

**Kiiraayi lawtaad yi nga won**

**Ak nujabaa-uy xarnu bi**

**Xutbu yi, yaw lañ daa fegoo**

**Nattu ya góor ña daa tegoo**

**Lasyaax yi yaw lañ daa sagoo**

**Bay laaj hidaayay xarnu bi**

**Naar yaa ngi am hidaaya tay**

**Tiijaan di laaj hidaaya tay**

**Te masu ñoo weesu bu rëy**

**Yaw la ñu roy ci xarnu bi**

**Seex Bàmba, yaa di ab newet**

**Sébbi nga tooyal gépp wet**

**Bay nga mu ñor, góob nga ba fat**

**Man ngaa dundal waa xarnu bi**

**Dundal nu, noo di sa'g njaboot**


**Wodd nu nee nu wàkk boot**

**Te suturaal nu, may nu mbóot**


**Nee léen «amiin» yéen xarnu bi**



**Yaay fekk waayi nJORONDAAY  
Nga fal ko, boole kook i gaay  
Ni doomi Maam Sëynabu Njaay  
Làmp bi won ci xarnu bi**




**Muriid yi yaa yor séen ngërëm  
Sëriñ si yaa yor séen xorom  
Biñ la gisul ñi'ng ne xerem  
Fajal nu aajoy xarnu bi**




**Seex Bàmba yaa di ag nduyoor  
Sëriñ si ñoo doon njawli-bээр  
Waa ju la nemm falu buur  
Sa lem gi neex na xarnu bi**

**«Wa saabixuuna saabixuun»  
Yàllaay boroom «Kun fa yakuun»  
Éy waaye gaay ya fi jëkkoon  
Ñoo yóbb mbóoti xarnu bi**



**Ña rafle woon wodd na léen  
Ña rifle woon sedd na léen  
Ruu ya gëmoon wommat na léen  
Bañ wommataale xarnu bi**



**Ña ko bëggoon Seexal na léen  
Ña ko bañoon suuxal na léen  
Ña xàddi woon neexal na léen  
Bañ delsi ànd ak xarnu bi**

**Seex Bàmba yaay gayndeg ñëloor**

**Ag ndaama sóobutil sa mboor**

**Soo doon u weer di weeru koor**

**Mbaa weeru gàmmuw xarni bi**

**Fàddal nu ndaama yii di daan**

**Notal nu noon yii di nu daan**

**Jàggil nu bër yii buñ nu daan**

**Te def nu mbër ci xarnu bi**

**Seex Bàmba yaa matub Sëriñ**

**Yaa xóot i mbir te yaa xarañ**

**Waane wi yaa raw ab marañ**

**Say gaal a jàlle xarnu bi**

**Soppi nu ay wagook i gaal**

**Ten yab sa marsandiisi haal**

**Te yóbb góori senegaal**

**Def nub masin ci xarnu bi**

**Seex bàmba yaa matub sèriif**

**Mbàkkeek mbusoobe dootu soof**

**Séen xol ya war na ne gariif**

**Maam Jaara tiim na xarnu bi**

**Siggil nga waa Mbàkke bawal**

**Mbàkke kajoor yaa léen bewal**

**Penku bawal yaa léen defal**

**Lu tax ñu siw ci xarnu bi**

**Mbàkke dimb ak mbàkke xewar**

**Ak mbàkke baari, kër sayar**

**Saañanka bàmbaa léen defar**

**Ba ñuy defar waa xarnu bi**

**Askanu kër Maam Maharam**

**Yaa tax ba waa ju ñu gërëm**

**Mu ber kërëm am i dërëm**

**Daagul rusoo ci xarnu bi**

**Daaru Salaam, Daarul Minan**

**Daaru yi fii kulli saman**

**Yaa léen joxon la ñu yoroon**

**Ku weddi seetal xarnu bi**

**Yaa tax ñu doon i kàppitaal**

**Niroowu ñook i fàkk-taal**

**Am nañu barke am alaal**

**Ñoo gàddu mboolem xarnu bi**

**Sa daaru yee diy lóppitaan**

**Ku ràgg war na lay dagaan**

**Ku ñëw nga jox garab mu naan**

**Doktoor bi yaa faj xarnu bi**

**Ràggi xol ak ràggi yaram**

**Yaa koy ragal joxey ngërëm**

**Jarag yi war nañ laa gërëm**

**Ngir yaa wéral séen xarnu bi**

**Fekkoon nga réew mi def i ndóol**

**Fekkoon nga ñépp def i gool**

**Yaa tax ba nuy niinal i bool**

**Yafal nga mboolem xarnu bi**

**Fekkoon nga ñii def i lafañ**

**Ñii daanu far ba ne fëlëñ**

**Ñoo ku ñu ñaan jabar mu bañ**

**Ñii mel ni man ci xarnu bi**

**Yaa dikk jag ya fi dammoon**

**Jénganti mbir ya fi dëngoön**

**Yékkati néeg ya suufe woon**

**Bañ man a ànd ak xarnu bi**

**Amal nga gaa yu amulon**

**Xamal nga gaa yu xamulon**

**Feeñal nga mbir yi nëbbu won**

**Dekkal nga ruuhi xarnu bi**

**Sa waay du ñee waayi kaneen**

**Sa waay du xàcc jëm faneen**

**Deesu la xam di gëm keneen**

**Sa diine doyna xarnu bi**

**Taxoon nga ruu yi dajaloo**

**Te wootewóo, te fitalóo**

**Te watewóo ni kuy faloo**

**Lislaam nga moome xarnu bi**




**Xàlloon nga ngér mi ba mu weex**

**Ku ci awoon mujj na seex**

**Te masulaa jàdd ak a jeex**

**Ba yóbb mboolem xarnu bi**

An illustration of two stylized human figures in profile, facing each other as if in conversation. They are rendered in shades of grey and green. The background behind them is a large, light yellow circle with a dashed white border. The text 'Wolof Ak Hamle' is written across the bottom of this circle in a light grey, sans-serif font.

**Wommat nga ruu yi jox boroom**

**Sàmmal nga cër yi séen boroom**

**Seex Bàmba ken du sa moroom**

**Yaa man a jàlle xarnu bi**

An illustration of a stack of five books of varying colors (yellow, orange, green, blue, and red) stacked on top of each other. The books are rendered in a simple, cartoonish style.


**Dekkal nga julli yi juróom**

**Ba ceddo yaa ngi jàppi wóom**


**Te fetaloo bañ am i góom**

**Yaa wone diiney xarnu bi**

**Aw nga siraatal mustaxiim  
Te boolewoo wal ak i doom  
Ba àgg yaak sa yépp doom  
Tay ñi ngi wommat xarnu bi**



**Sunna si yaa ko dekkalaat  
Tërbiya yaa ko yeesalaat  
Te alxuraan yaa ko falaat  
Yaa bindloo won xarnu bi**



**Fekkon nga ñuy waññ ak a toor  
Daa takk i ndomboy takk i cuur  
Yaa samp i daara, fal i wuur  
Tasaare daaray xarnu bi**

**Soppi jigéen ñiy muslimaat**

**Ñuy dawu góor ni muhsinaat**

**Rékki takkaayi séen i baat**

**Di muuru dëddu xarnu bi**

**Yaa tax nu daa sellali jëf**

**Yaa tax nu tekki nun wolof**

**Yaa tax ba nuy way di walif**

**Xamal nga gaa yi xarnu bi**

**Jirim yi yaa don séen i baay**

**Baayo yi yaa doon séen i yaay**

**Miskiin yi yaa doon séen nijaay**

**Yaay wéeruwaayu xarnu bi**

**Ku jooy fi yaw nga noppiloo**

**Ku xiif fi yaw nga reggloo**

**Ku mar fi yaw nga màndiloo**

**Màndal nga góoru xarnu bi**

**Billaahi yaa mat li nga doon**

**Noo seddu teggi cer bu duun**

**Wàccal, damul, laggul te téen**

**Nde wub nga làmbi xarnu bi**

**Mboolem sahaabatu rasuul**

**Ak bër ya daa tagg rasuul**

**Mel na ni bay nga séen i tool**

**Bayaale tool i xarnu bi**

**Kahab da daa tagg rasuul**

**Busayri daa tagg rasuul**

**Hassaanu daa tagg rasuul**

**Semmal nga léen ci xarnu bi**

**Yaa raw ña daa janook rasuul**

**Ngir yaa liggéey ba am wusuul**

**Ba def xaliifatu rasuul**

**Kawe nga mboolem xarnu bi**

**Yoon wa mu aw ba raw mbindéef**

**Ba def donoy ngën ji mbindéef**

**Maneesu koo xamal mbindéef**

**Jomb na mboolem xarnu bi**

**Diggante mulkook malakóot**

**Ba sar ca péey i jabaróot**

**Ken masla boole séen i bóot**

**Lut Bàmba bàjjob xarnu bi**

**Aras la daa giseek boroom**

**Kursiyu lay xamey soloom**

**Diiwaan la daa faley moroom**

**Di folli seef i xarnu bi**


**Moom la ñu may nuurul jalaal**

**Moom la ñu may nuurul jamaal**

**Mu boole kook sirrul kamaal**


**Leeram ya dar na xarnu bi**

**Gaa leer, ca lay jañey cibeel  
Gii leer ca lay ñoddeey ngëneel  
Kamaal ga lay faleey meteel  
Seexal na mboolem xarnu bi**



**Yàlla la daa sukkandikoo  
Yonnen la daa jottalikoo  
Jibriil la daa dimbandikoo**

**Ba jot ci mbóot i xarnu bi**



**Téere ya lay wéttalikoo  
Durus nga lay moyandikoo  
Pexe ya noon ya daa jagoo**

**Ba të na nooni xarnu bi**

**Taalif la daa jëfandikoo**

**Mahfuus la daa gàngandikoo**

**Hikkam la daa sukkandikoo**

**Moo nàndaloon waa xarnu bi**

**Tawhiid la daa xamali jaam**

**Hikaaya lay xëyee subaam**

**Riwaaya lay gonte ne kaam**

**Du jëw du jànni xarnu bi**

**Fum toll day tagg rasuul**

**Du war watay dammi rasuul**

**Du werse boŋ ci tarasool**

**Moo gën a wuuteek xarnu bi**



**Dem jàkk a moo ko tax a nooj**

**Julli na fiy ràkk a ba géej**

**Aj màkka mas na ko ne ngéej**

**Faadiilu aj na xarnu bi**

**Njool màkka daal lay sigiree**

**Soo ko tudee mu daldi ree**

**Giñ naa ne daawu ñu soree**

**Jikkoom ya waar na xarnu bi**

**Fab na ca xayru lanbiyaa**

**Jikko yu raw yuy lawliyaa**

**Moo raw xiyaaru lasfiyaa**

**Déndam amul ci xarnu bi**

**Dëddoom gu mat ga mu jagoo**

**Ak xam gu mat ga mu jagoo**

**Ak muñ gu rëy ga mu sagoo**

**Mus la tawat ci xarnu bi**

**Nattoom yu rëy yam daa tegoo**

**Te teewu koo ànd ak sagoo**

**Te amna bóot yu mu fegoo**

**Te du ko feg ci xarnu bi**

**Dunyaa da koo wanon gannaaw**

**Masula faale yamu laaw**

**Jublu ci Yàlla ne njanaaw**

**Wakkiirlu dëddu xarnu bi**

**Bëggul galan bëggul medaay**

**Bëggul lu ab tubaab di jaay**

**Jaayante na ak Yàlla sa waay**

**Gaŋe na mboolem xarnu bi**

**Bëggul fas ak nag ak galeem**

**Bëggul bay ak xar ak i doom**

**Bëggul a am sàqi njuróom**

**Du jaay du jandal xarnu bi**


**Bëggu la am junni yu ron**

**Bëggu la dox di yor i bon**

**Moo mas a dox ba dem gabon**

**Dellu si fii ci xarnu bi**


**Dërëm du yàq ab deram  
Wurus du tax mu ras bëtëm  
Nawul dërëm xeebul përem  
Moo gën a wuuteek xarnu bi**

An illustration showing two stylized human figures in profile, facing each other as if in conversation. They are rendered in shades of grey and green. The background behind them is a large, light yellow circle with a dashed white border. Below the figures, there is a stack of four books in yellow, orange, and green. The text 'Wolof Ak Hamle' is written in a light grey, sans-serif font across the middle of the yellow circle.


**Dërëm xàmmeewu kook xandeer  
Diinaar xàmee wu kook ganaar  
Kuy waaru bàmba doyna waar  
Cey Yàlla ! bàjjob xarnu bi**

**Mbindéef yi yépp a yam fi moom  
Alal yi yépp a yam fi moom  
Bëggul bañul xeebul du yéem  
Mooy génn góor ci xarnu bi**

**Bawal-bawal akub ajoor  
Sàmm ak i baadoolook i buur  
Ku laaj mu jox la lay sa muur  
Di nég li des ci xarnu bi**




**Mbàkke gënul fi moom guyaar  
Kon ummi mbàkkeek taar bi kaar  
Kon du ko may sëriñ guyaar  
Xamul ku bon ci xarnu bi**



**Tabax, gënul fi moomi baar  
Àngaar, gënul fi moom sabaar  
Baari, gënul fi moom pataar  
Kon du fa jug ci xarnu bi**


**Wolof, gënul fi moomi naar  
Gàннаar, gënul fi moom mbayaan**

**Kon taaxi jurbel du fa jaar  
Ba def jumaa ci xarnu bi**

An illustration of two stylized human figures in profile, facing each other as if in conversation. They are rendered in shades of grey and green. The background behind them is a large, light yellow circle with a dashed white border. The text is centered over this circle.

**Wata, gënul fi moom saxaar  
Mbaanig gënul fi moom daqaar  
Rusul a yalwaan ak a xaar**

**Ba Yàlla jox ko xarnu bi**

An illustration of a stack of four books of different colors (yellow, orange, green, and red) stacked on top of each other. The background behind the books is a light yellow circle with a dashed white border. The text is centered over this circle.

**Màggat, gënul fi moom sixaar  
Ndaw it, gënul fi moom kibaar  
Njàccaar, gënul gumba gu taar**

**Gu jox tumam ba xarnu bi**

**Bàmbaay boroom «kun, fayakuun»!**

**Moo donn Ahmadul Amiin**

**Moo tax amul xejj ak i séen**

**Mooy yërmandey waa xarnu bi**

**Baatin la daa fab di nu jóor**

**Du mere nit, ba di ko dóor**

**Mboolem jigéenam ak u góor**

**Defar na léen ci xarnu bi**

**Tarbiya, lay yarey goneem**

**Tarxiya, mag ña won fa moom**

**Tasfiya, bër yu deefi yéem**


**Bañ man a ànd ak xarnu bi**

**Diraaya, lay xamal goneem**

**Inaaya, moodi ay jikkoom**

**Wilaaya, lay defal boroom**

**Cofeel gu am ci xarnu bi**



**Cofeel gi, moo ma ko xamal**

**Xam-xam bi, raw na sama xel**

**Leeram gi, fees na sama xol**

**Baawaan ci gaa yi xarnu bi**

**Wolof Ak Kainle**



**Moo tax ba dóotu ma selaw**

**Cofeel gi, tee na maa nelaw**

**Maa nguy wéréelu, ni gelaw**

**Dóotu ma toog ci xarnu bi**




**Leeram gi, daal may tex-texaan**

**Saa xol di dem, ba poroxaan**

**May naan ba màndi, coroxaan**

**Di buusu gaa yi xarnu bi**

An illustration of two stylized human figures in profile, facing each other as if in conversation. They are rendered in shades of grey and green. The background behind them is a large, light yellow circle with a dashed white border. The text 'Wolof Ak Kannele' is written in a light grey, sans-serif font across the middle of the circle.

**Seex Bàmba, yaa di sun Imaam**

**Yaw la nu teg fa sun amaam**

**Yaw la nu doyloo, ba fa saam**

**Rammu nu, nook waa xarnu bi**

An illustration of a stack of five books of varying colors (yellow, orange, green, blue, and red) stacked on top of each other.


**Sëriñ si woon dañoo téxem**

**Ñoo way ne ñeex, ba xerem**

**Seex Bàmba, moo safon xorom**


**Safaale gaa yi xarnu bi**

**Ku leen faboon, teg ci balaas  
Jël Bàmba, teg ca bee balaas  
Konte, mu wat séen i palaas  
Mbàkke! du maasam xarnu bi**

An illustration showing two stylized human figures in profile, facing each other as if in conversation. They are rendered in shades of grey and green. The background behind them is a large, light yellow circle with a dashed white border. The text is overlaid on this circle.

**Xawsu ya, mooy séen Yilimaan  
Moo sàmmuwaanteek Alxuraan  
Adiisi Yonnen, ba rañaan**


**Moo ko xamal waa xarnu bi**

An illustration of a stack of four books with yellow, orange, and green covers, resting on a stack of white, fluffy clouds.


**Moo am "fasaahatu lisaan"  
Laaya yi, moo xam seen cosaan  
Moo xam, la wàcce asamaan**

**Jëmsi ci suusi xarnu bi**

**Moo am "mahaarijul huruuf"  
Làmmeñu yaaram lañ ko roof  
Mooy waykatub gën ji mbindéef  
Maay waykatam ci xarnu bi**




**Mooy "Muhjisaati adnaan"  
Yuñ wàcce aaxirus samaan  
Di rammu xeet wu jëm jinaan  
Tuubaa li ahli xarnu bi**




**Tuubaa, ñehal na kuy muriid  
Waylun, ñehal na kuy mariid  
Yal na nu Bàmba def muriid  
Neeleen "amiin" yéen xarnu bi**

**Jox naa ko fàww sama xol  
Saabub ngënëel a may setal  
Térub mbalaan i sama xol  
Fóotal nu gàkki xarnu bi**




**Bàmba, da ngay boroom i may  
Te nun, nu def woroom i moy  
Moo tax nu sax ci di la way  
Ndaxte, nga jéggal xarnu bi**




**Wayu nu ngir bëgg iy dërërm  
Mbàkke, danuy sàkku ngërëm  
Ca bis ba Yàlla di yërëm  
Xeet wi ne woon ci xarnu bi**

**Yaw mi laggeeyal sa boroom  
Ba am ngërëm "xayrul Xadiim"  
Wàllil nu yaw ci say juróom  
"Yawma yaquumu" xarnu bi**



**Tàbbal nu "jannatul nahiim"  
Ten dëkk fa ak sa yépp doom  
Wuntu ya, yaa yor seen i doom**

**Tijjil dugal waa xarnu bi**



**Ridwaan tijjil na la, nga wéy  
Jox na la njénd yu la doy**

**Waa ju la soob mu daal di wéy  
Yaa ame caabiy xarnu bi**

**Nopplujil ca «hilliyiin»**

**Yàlla gërëm nala ak Lamiin**

**Yonen gërëm na la ak ñeneen**

**Ak xulafaa-uy xarnu bi**

**Ak Mursaliina ak Lanbiyaa**

**Ak taabihiina ak lawliyaa**

**Jinne ya ak Malaayika ya**

**Gërëm nañook waa xarnu bi**

**Yural sa poŋ, te dem fanaan**

**Diggante kawsara ak jinaan**

**Nottil te lekk nag, te naan**

**Jaajëf! defar nga xarnu bi**

**{Alhamdulillaahi na ngéen;**

**Di sant rabbal haalamiin**

**Doom a di baay kii du kaneen**

**Man naa defar waa xarnu bi}**

**Yaw mi laggéeyal Mustafaa**

**Bul fàtte, Amdi Mustafaa**

**Ak doomi baayi Mustafaa**

**Ñoo ame bóot i xarnu bi**

**Mat na xaliifatul xadiim**

**Fees na plaas ba mat na doom**

**Te amna xam-xam, ame koom**

**Man naa musal waa xarnu bi**

**Noppeek, goreek, tàllal ndijoor**

**La moome saalum ak kajoor**

**Ku laaj, mu jox la lay sa muur**

**Te musla gântul xarnu bi**

**Taafeeri Njool Aaminata**

**Yaa donn njool aaminata**

**Tuubaa di sun madiinata**

**Yaay weer wi tiim waa xarnu bi**

**Yaa neex a way, te neex a taas**

**Ngir xarnu bii, amoo fi maas**

**Li dale fii, ba weesu faas**

**Yaw lañu jébbal xarnu bi**



**Raayaw ngënëel wi yaako yor**

**Yaa teggi tuur ba, daw ba sar**

**Ngir naaru góor ak fasu par**

**Rawantewuñ ci xarnu bi**

**Mboolem sixaarun wa kibaar**

**Yaa tax ñu tàbbi ci'g saxaar**

**Ba wàcc Tuubaa ngën ji gaar**

**Noppal nga léen ci xarnu bi**


**Robino yaangiy walangaan**

**Nuy naani kawsara ak jinaan**


**Dóotu nu tàppaatuy sayaan**

**Jaajëf! defar nga xarnu bi**

**Jumaa ji yaa ko taxawal  
Yaa tee mu naaxsaay niw yorol  
Naalam wi yal nang ko matal  
"Aamiina" war na xarnu bi**



**Yaw la sulaymaan xamalon  
Karyeer ba, doj ya ca deson  
Jumaa ja bayti tabaxoon  
Moom ngay defal waa xarnu bi**



**Daawuda Bàmba lay misaal  
"Baytil Muxaddasi" la naal  
Wuyji boroomam ba kamaal  
Taaw ba defal ko xarnu bi**

**Ndommoy ngénéel ya won ca maam**

**Yay sētu kokki aki ndaam**

**Nga boole kook ngénéé li daam**

**Ràngoo, amoo ci xarnu bi**

**Murit yi jox nala'y Idaay**

**Tubaab ya jox la ay midaay**

**Sultaan nga boole kook wilaay**

**Yaa man a tàggat xarnu bi**

**Yàlla na ngay muuram muriit**

**Te Yàlla booy, muuram mēriit**

**Bihaqi xaadirin muriit**

**Ndax Yàlla naatal xarnu bi**

**"Allaahu sul fadlil asiim"**

**Kum jox ngënëel deefi la yéem**

**Faadilu mooy "fadlu hamiim"**

**Turam wi, doyna xarnu bi**

**Mooy doomi "shamsun wa xamar"**

**Mbàkkeek, mbusóobe duñ ko jar**

**Moo nàmp yaari meeni ngor**

**Mooy Bàmba tay ci xarnu bi**

**Saddiiti baayam lay royaat**

**Leerug cosaan ga day royaat**

**Nday jaa di xayru muhsinaat**

**Moo donn mbóoti xarnu bi**

**Mooy noobalub lilaam fi nun**

**Mboolem shariif yi moo ci gën**

**Donoy usaynu wal hasan**

**Maay xaadamam ci xarnu bi**

**Ma wax la lëf, ci ay jikkoom**

**Lewet, woyof, ànd ak sagoom**

**Niru na baay ba, mat na doom**

**Ëmb na kersag xarnu bi**

**Dem na ba màkkam jullikaay**

**Haj na, siyaare ngën ji baay**

**Te ëndiwul alal di jaay**

**Nawleem amul ci xarnu bi**

**Taalif i baayam ay wayam**

**Moo donn duusi xam-xamam**

**Moo naan ci gééjug hikkamam**

**Sirroom ba, doyna xarnu bi**

**Yàlla na am lamuy mébét**

**Ci nun, nu am li nuy mébét**

**Ci moom, te yal nan am i sèt**

**Yu gën a gëm waa xarnu bi**


**Nan tagg ahmadul amiin**

**Moom la ñu may sirrul masuun**


**Xarbaax la feese, ba ne guun**

**Baay baa ko lëm ci xarnu bi**

**Baatin ba, jaaxal naw kajoor  
Moo tax ñu lëm ko jame biir  
Soo ko gisee ma ngay bangéer  
Ni kuuy lu mat ci xarnu bi**



**Faj aajo, moo ci gën a gaaw  
Lum wax boroomam mu ne waaw  
Day fal di folli ci lu gaaw  
Mat naa ragal ci xarnu bi**



**Day way te jàngulon haraf  
Te màndaxaam du ca suruf  
Moo man Araab te man Wolof  
Jommal na mboolem xarnu bi**

**Fab na ca baayam, yan yu diis**

**Te nduruwul boroomu tiis**

**Kuy rooti, moodi dex gu fees**

**Moo man a màndal xarnu bi**

**Sañ-sañ ba, làndi na ci moom**

**Jagle ga jiitu nab juddoom**

**Mbër mu ko sóoru daal di luum**

**Mbiram xajul ci xarnu bi**

**Rijaal ya ,xam nañ darajaam**

**Bu nee jalañ, ñuy saf i jaam**

**Nërëm-nërëm, di safi baam**

**Raamal ko war na xarnu bi**



**Yal nañ ko may mbóoti lamiin**

**Fegal ko ayu bépp noon**

**Ku dégg ñaan, na ne amiin**

**Ndax Yàlla naatal xarnu bi**

**Mbég maa ngi teeru leen basiir**

**Donoy basiiran wa nasiir**

**Ku teeru naan, lekk ba suur**

**Doo ñàkk lëf ci xarnu bi**


**Moo am jalaal te am jamaal**

**Te xar kanam ga leer kamaal**


**Tem bari xam-xam am alaal**

**"Buurika fiika" xarnu bi**

**Taar ba ca yuusufal kariim  
Ba buur ba fal ko def ko doom  
Jigéen ja far tàngook sagoom  
Manga ak basiirum xarnu bi**




**Ca ag rawam, la daal di raw  
Fóore ya daa fireek a raw  
Masu la jaar ci yëfi ndaw  
Masu la faale xarnu bi**




**Sóobu na ngérum tasawuuf  
Ku ko rawoon, nee na la wif  
Moo raw ña xàllon moom a lef  
Sakkaa ñi teewe xarnu bi**

**Hilmud Diraaya la jagoo  
Mbirum hinaaya la lëkkoo  
Nuurul wilaaya la sagoo  
Dendam amul ci xarnu bi**




**Durus ci téerey alxuraan  
Mbaa muy julleek a jàngì ñaan  
Yooyu la baaxoo, te ku ñaan  
Mu may la lëf ci xarnu bi**




**Yal na fi sax, ba dégg maam  
Te tol ni maam Ahmadu daam  
Te donn mbóot ya won ca daam  
Ndax Yàlla naatal xarnu bi**

**Allaahu moodi jenn waay  
Mooy jàpp doom, def ko ni baay  
Ñu bokk benn ub taxawaay  
Abdoo, di Bàmbam xarnu bi**

An illustration of two stylized human figures in profile, facing each other as if in conversation. They are rendered in shades of grey and green. The background behind them is a large, light yellow circle with a dashed white border. The text is overlaid on this circle.

**Booko gisee muy sammandaay  
Seex Bàmba, ñoo niroob jataay  
Niroo yaram, niroo sewaay**

**Niroo deret ci xarnu bi**

An illustration of a stack of four books of different colors (yellow, orange, green, and blue) stacked on top of each other. The text is overlaid on a light yellow circular background with a dashed white border.

**Niroo doxiin, niroo waxiin  
Niroo jëmm ak melook defiin  
Buy ree nga waat ne du keneen  
Bàmbaa ñëwaat ci xarnu bi**

**Moodi wallax-njaanu jinaan**

**Bu léen ko xool bët i kañaan**

**Kañaan du tee béjjan a daan**

**Baayam a leeral xarnu bi**

**Moo donn tab, ga woon ca moom**

**Moo donnn njambaar ga ca moom**

**Séen baay a séddaley jikkoom**

**Sédde ko lii ci xarnu bi**


**Baatin ba, raw na saahiram**

**Day gaaw a soppi ay mbiram**


**Mbir ma ca baayamay mbiram**

**Moo yor jaliili xarnu bi**

**Yal nañ ko dolli ay muriid  
Te yal na raw pexem mēriid  
Te yal na mujj di'b fēriid  
Ba tol ni gaayi xarnu bi**



**Nan ñaan ci Yàlla miy Samad  
Mu may Sëriñ Abdu Samad  
Te may Sëriñ Abdu Lahad  
Lu doy a doy waa xarnu bi**



**Ci bóoti "xul huwal fadhliin"  
Sëriñ bu mag bi gën ci yéen  
Yàlla bu séeni barke neen  
Ndax Yàlla naatal xarnu bi**

**Te yokk Abdul Qadiri**

**Fii baatinin wa saahiri**

**Bijaahi baayu taahiri**

**Bam tol ni Jiilim xarnu bi**

**Te yal na Ibraahima moom**

**Def ab xariit fa sun boroom**

**Ba jot ca bóot i turandóom**

**Ndax Yàlla naatal xarnu bi**

**Mboolem ñi dooni saalihiin**

**Ci sowwu jant, mbaa feneen**

**Yàlla na saalihu di séen**

**Jant bu tiim waa xarnu bi**

**Dundug Sohaybu ga ak, alaal**

**Ju bari ja ak, jam darajaal**

**Yal na ko Seex Bàmba misaal**

**Ci sun Suhaybum xarnu bi**

**Te maynu barke ak ridaa**

**Te sol ngërëm ci murtadaa**

**Ba ku ko soob mu def xadaa**

**Haajaatihii, ci xarnubi**

**Te boole luy taaw ak i caat**

**Góor ak jigéen, ci benn baat**

**Ndax Yàlla sun xarnu bi naat**

**«Aaamiina» war na xarnu bi**




**Mboolem lu Sayxu Bàmba am**

**Yal nañu gën te yokku ngëm**

**Kon, lee nu bokk ame ndam**

**Te am ngërëm ci xarnu bi**


An illustration of two stylized human figures in profile, facing each other as if in conversation. They are rendered in shades of grey and green. The background behind them is a large, light yellow circle with a dashed white border. The text 'Wolof Ak Hamle' is faintly visible in the background.

**Muusaa ka miy séen werekaan**

**Moo léen di way, di léen dagaan**

**Tey sant, tey tagg ak a ñaan**

**Ndax yàlla naatal xarnu bi**

An illustration of a stack of five books of varying colors (yellow, orange, green, blue, and red) stacked on top of each other.

**Waykat yi buñ yaboo ni xiim**

**Maa war di xaadimul xadiim**

**Damay muriid, di jaam, di doom**

**Te gën a bon ci xarnu bi**

**Ngir Abdu Mbàkkem soxna Mbay**

**Ak Maaharam mi ñépp ñoy**

**Mooy baayi-yaayi sama nday**

**Maa dikke nii ci xarnu bi**

**Saynabu Mbàkkem Absa njaay**

**Ak Maaharam miy ngën ji baay**

**Mooy yaayi-baayi sama yaay**

**Maa dambe yii ci xarnu bi**

**Man léebu naa leen, kàll leen**

**Way naa wolof, ba làkk leen**

**Way naa araab, ngir bëgg ngéen**

**Xam Bàmba, yéen waa xarnu bi**

**Way naa ko Sëhru ramadaan**

**Mi Yàlla wàcce Alxuraan**

**Ngir bëgg lépp lu ma ñaan**

**Yàlla defal ko xarnu bi**

**Jullil ci ngën ji Addnaan**

**Muusaa, te ñaan ko ba nu naan**

**Géwal bu jaaxlee war a ñaan**

**Ndax Yàlla naatal xarnu bi**

**Aamiin ! Allaahumma salli halaa sayyidinaa  
Muhammadin wa aalihii wa sahbihii wa xayra**

**xadiimihii wa sallama tasliiman,**

**Subhaana rabbika rabbil hissati hammaa yasifuun wa  
salaamun halal mursaliin Wal hamdu lillaahi rabbil  
aalamiin**

**Aji-bind ji: Seex Lóo**



**Ngir bokk ci mbootaayug WAX (Wolof  
Ak Xamle) jukkool ci limat yii 76 317 83  
17 / 78 426 61 25.**